



Wake kwa Uumbaji na kwa

Ukombozi

Mikono yako ilinifanya ikanitengeneza.—Zaburi 119:73.

Hebu tutafakari wazo la fadhila tuliyo nayo. Wapo wengi sana ambao, wakiwa taabuni, huanguka katika majaribu na kukosa mwelekeo wao. Huwa wanasahau mialiko ambayo Mungu ameitoa kwa wingi, na kuanza kutazama na kupanga kwa ajili ya msaada wa kibinadamu. Wanakwenda kutafuta msaada kwa wanadamu, na hii ndiyo njia ambayo kwayo uzoefu wao unakuwa dhaifu, na wenye kuchanganyikiwa. Katika majaribu yetu yote, tunaelekezwa kumtafuta Bwana kwa bidii zaidi, tukikumbuka kwamba sisi ni mali Yake, watoto Wake kwa kuasiliwa. Hakuna mwanadamu awezaye kuelewa mahitaji yetu kama alivyo Kristo. Tutapokea msaada ikiwa tutamwomba Yeye kwa imani. Sisi tu Wake kwa uumbaji, sisi tu Wake kwa ukombozi. Kwa kamba za upendo wa Mungu tumefungwa kwenye Chimbuko la uwezo na nguvu zote. Ikiwa tu, tutamfanya Mungu kuwa tegemeo letu, tukimwomba Yeye kwa ajili ya kile tunachohitaji kama mtoto mdogo amwombavyo baba yake kwa ajili ya kile anachokitaka, tutapata uzoefu mkubwa sana. Tutajifunza kwamba Mungu ndiye chimbuko la nguvu na uweza wote.

Ikiwa wakati unapoomba, hutajisikia tendo lolote la kihisia, usidhani kwamba ombi lako halijajibiwa. Yeye asemaye, "Ombeni, nanyi mtapewa; tafuteni, nanyi mtaona; bisheni, nanyi mtafunguliwa; kwa maana kila aombaye hupokea; naye atafutaye huona; naye abishaye atafunguliwa," atasikia na kukujibu. Hebu basi uruhusu Neno Lake liwe tumaini lako, omba na kutafuta, na upate fadhila ya kupata. Kristo amekutia nguvu. Yeye anasema, "Njoni kwangu, ninyi nyote msumbukao na wenye kulemewa na mizigo, nami nitawapumzisha. Jitieni nira yangu"—nira ya vizuizi na utii—"mjifunze kwangu; kwa kuwa mimi ni mpole na mnyenyekevu wa moyo; nanyi mtapata raha nafsini mwenu."

Tunapaswa kupata pumziko kwa kuvaa nira Yake na kubeba mzigo Wake. Kwa kuwa watendakazi pamoja na Kristo katika kazi kuu ambayo kwa ajili ya hiyo alitoa maisha Yake, tutapata pumziko la kweli. Tulipokuwa wenye dhambi alitoa uhai Wake kwa ajili yetu. Yeye anataka tumjie Yeye na kujifunza juu Yake. Kwa namna hiyo ndivyo tupatavyo pumziko. Yeye anasema, atatupatia pumziko. Hivyo usimtwike mwanadamu mzigo wako. "Mjifunze kwangu; kwa kuwa mimi ni mpole na mnyenyekevu wa moyo." Kwa kufanya hivi utapata katika uzoefu wako mwenyewe pumziko ambalo Kristo analitoa, pumziko linalokuja kwa kuvaa nira Yake na kuinua mizigo Yake.

Mungu amekuwa akifedhehesha sana na watu Wake wanaotegemea wanadamu. Yeye hakutuambia tufanye hivyo. Yeye ametuambia kuwa atatufundisha, atatuongoza...Fikiria ni ahadi nyingi kiasi gani ametupatia, tunazoweza kuzishika kwa mkono wa imani...Yeye anataka tumjue Yeye, tumwambie Yeye, tumweleze matatizo yetu na tupate uzoefu katika kumwomba Yeye ambaye kamwe hafanyi maamuzi yasiyo sahihi na wala hakosei (Manuscript 144, 1901).